

明

紀

冊六

四

五

六

明紀卷第十四

賜進士出身工部候補主事虞衡司行走陳鶴簪

卹贈知府銜給雲騎尉世職內閣候補中書孫男克家參訂

英宗紀二

起正統九年甲子訖正統十四年己巳失位凡六年

九年春正月進竊翰林學士 甲寅王文巡延綏寧夏邊劾治定邊

營失律都督僉事王禎都督同知黃真邊徼爲肅 朵顏福餘二衛

附瓦剌泰寧衛拙赤以女妻也先皆陰爲之耳目入貢輒易名且互

用其印又東合建州兵入廣寧前屯帝惡其反覆辛未朱勇吳克忠

及中官錢僧保出喜峯口徐亨及中官曹吉祥出界嶺口都督馬亮

及中官劉永誠出劉家口陳懷及中官但住出古北口各將精兵萬

人分勦之 二月丙午王驥破思機發巢走之得其妻子部落以獻

蔣貴子雄乘敵敗帥三千人深入敵扼其後自刎沈烏江事聞贈指

揮使帝尋召驥等還 三月辛亥朔新建太學成釋奠於先師孔子

楊士奇老耄子稷傲很嘗侵暴殺人言官交章劾稷朝議不卽加
法封其狀示士奇復有人發稷橫虐數十事遂下之理士奇以老疾
在告帝恐傷其意降詔慰勉士奇感泣憂不能起甲子卒年八十贈
太師諡文貞有司乃論殺稷士奇雅善知人好推轂賢士所薦達有
初未識面者于謙周忱況鍾之屬皆爲世名臣 朱勇等捕兀良哈
擾邊者奪回所掠人畜馬亮劉永誠至黑山大松林流沙河徐亨至
河北川勇至富峪川而還乙丑論功加勇太保進亨爵侯封陳懷平
鄉伯亮招遠伯是役也王振主之故諸將功少率得封 夏四月丙
戌翰林學士陳循直文淵閣預機務初廷議天下吏民建言章奏皆
三楊主之至是士奇榮已卒循及曹鼎馬愉在內閣禮部援故事請
帝以楊溥老宜優閒令循等預議 初也先欲與沙州及赤斤蒙古
二衛婚二衛不欲並奏遵奉朝命不敢擅婚帝以瓦剌方強其禮意
不可卻諭令各從其願赤斤蒙古又遣人乞徙善地帝諭以土地不

可棄令獎帥頭目圖自強丁亥以二衛饑困令邊人給粟振之 五月己未命法司錄在京刑獄刑部侍郎馬昂錄南京刑獄 給事中李素等劾周忱妄意變更專擅科斂忱上章自訴帝以餘米既爲公用置不問先是奸民尹崇禮欲撓忱法奏忱不當多徵耗米請究問倉庫主者忱因罷前法既而兩稅復逋民無所賴咸稱不便忱乃奏按崇禮罪舉行前法如故 六月壬午振湖廣貴州蠻饑 駙馬都尉石璟詈其家奄王振以爲賤己同類惡之秋七月己酉下璟獄 葉宗留盜福安銀礦福建參議竺淵往捕之被執死 癸丑免河南被災稅糧 初福建浙江有銀場洪武中歲課五千餘兩永樂宣德間遞增至十三萬兩有奇民不堪命帝卽位以大臣議罷之已而盜礦者日熾浙江參政俞士悅請復開謂利歸於上則礦盜自絕下三司議軒輓持不可乃止閏月戊寅給事中陳傳復請朝廷遽從之命侍郎王質往經理定福建歲課銀二萬餘兩浙江倍之又分遣御史

曹祥馮傑提督供億過公稅自是民困而盜愈衆 甲申瘞暴骸

壬寅雷震奉先殿鴟吻 八月庚戌免陝西被災稅糧贖民所鬻子

女 時也先漸強遣人授罕東諸衛都督喃哥等爲平章又置甘肅

行省名號陳鎰以聞甲戌敕邊將嚴備九月丁亥命王驥與鎰巡視

甘肅寧夏延綏邊務聽便宜處置初寧夏備邊軍半歲一更後邊事

亟三年乃更軍士日久疲憊又益選軍餘防冬家有五六人在邊者

軍重困驥請歲一更當代者以十月至而代者留至來歲正月乃遣

歸邊備足而軍不勞帝善其議行之諸邊 初成祖封忠順王以哈

密爲西域要道欲其迎護朝使統領諸番而其王率庸懦其地種落

雜居一曰回回一曰畏兀兒一曰哈剌灰其頭目不相統屬王莫能

節制及倒瓦答失里立與鄰國土魯番沙州罕東赤斤蒙古構怨數

被侵伐瓦剌也先王母弩溫答失里弟也亦遣兵圍哈密殺頭目俘

男婦掠牛馬駝取王母及妻北還脅倒瓦答失里往見懼不敢往數

遣使告難帝爲敕諸部令脩好迄不從惟王母妻獲還分麓川地
置隴川宣撫司治隴把冬十月丙午朔日有食之庚午兀良哈
貢馬謝罪永寧伯譚廣卒諡襄毅廣長身多力奮跡行伍大小百
餘戰未嘗挫衄在宣府二十年脩屯堡嚴守備增驛傳又請頒給火
器於各邊將校失律卽奏請置罪而撫士卒有恩邊徼帖然稱名將
御史李儼於光祿寺監收祭物王振過之怒其應對不跪下錦衣
衛獄謫戍鐵嶺衛時馬順掌鎮撫司罪無大小悉送順考訊陷害甚
衆順大通賄賂其門如市是年兩畿山東河南浙江湖廣大水江
河皆溢

十年春正月大計羣吏舉治行卓異者趙豫及寧國知府袁旭鳳陽
知府楊瓚吳縣知縣葉錫海豐知縣王懋慶雲典史趙亮預焉賜宴
及襲衣遣還職旭尋爲督學御史程富所誣劾逮死獄中寧國人惜
之立祠祀焉戊子詔舉智勇之士王振專恣日甚中官張環顧

忠錦衣衛卒王永心不平以匿名書暴振罪狀事發磔於市不覆奏

二月丁巳京師地震

己未免陝西逋賦

丙寅兀良哈貢馬請

貸犯邊者罪不許

壬申帝如天壽山三月甲戌朔謁陵丙子還宮

庚辰思機發入貢謝罪時麓川甫平參贊軍務侍郎楊寧以騰衝

所地要害請升爲騰衝軍民指揮使司與沐昂築城置衛設戍兵控

諸蠻邊方遂定昂尋卒贈定邊伯諡武襄

夏四月甲辰朔日有食

之 庚申詔所在有司飼逃民復業及流移就食者

六月乙丑振

陝西饑免田租三之二

秋七月乙未減糶河南懷慶二府倉粟濟

山東陝西饑民從于謙請也時二省民就食河南者二十餘萬公勦

掠謙奏令布政使年富安輯其衆授田給牛種使里老司察之流民

乃定

有中官牧馬霸州擾民知州張需笞其校卒王振怒逮需下

錦衣衛獄箠楚幾死詔戍邊并斥其舉主順天府丞王鐸爲民需在

州見民游食者衆爲設方略課耕桑樹畜不如教者罰之民皆勤力

州以富饒其得禍也人尤惜之 八月癸丑免湖廣旱災秋糧 丙
辰免蘇松嘉湖十四府州水災秋糧 九月鄺埜爲兵部尙書舊例
諸衛自百戶以下當代者必就試京師道遠無資者終身不得代埜
請令就各都司試之人以爲便瓦剌也先勢盛埜請爲備又與廷臣
議上方略請增大同兵擇智謀大臣巡視西北邊務尋又請罷京營
兵脩城之役令休息以備緩急時不能用 冬十月戊辰侍讀學士
苗衷爲兵部侍郎侍講學士高穀爲工部侍郎並入閣預機務 王
文出撫陝西陳鎰爲右都御史先是流民聚襄漢間鎰恐其嘯聚爲
亂請命河南湖廣陝西三司官親至其地撫卹之得旨允行而當事
者不以爲意及文代鎰復力言有司怠忽恐遺禍將來不省 緬甸
始以思任發及其妻孥三十二人獻至雲南思機發來襲總兵官黔
國公沐斌擊却之任發於道中不食垂死十二月丙辰千戶王政斬
之函首京師斌晟之子也機發屢乞降詞甚哀帝命受其貢敕斌及

楊寧經畫善後長策以聞并賜敕諭機發木邦遣使同獻任發首因求麓川地以孟止地予之 壬辰輸河南粟振陝西饑 柳溥討平慶遠叛蠻溥廉慎然無將略承山雲後不能守成法過於寬弛搖盪相扇爲亂溥先後討斬大藤峽賊渠楊容拾等破柳州思恩韋萬慶等諸蠻寨而賊滋蔓如故 以曹縣黃河北舊土城置曹州升曹縣知縣范希正爲知州先是山東饑惟曹以希正先積粟得無恙巡撫大理寺丞張驥以聞故有是命 時遣官度大同宣府二鎮軍田一軍八十畝外悉徵稅五升羅亨信言文皇帝時詔邊軍盡力墾田毋徵稅陛下復申命之今奈何忽爲此舉塞北諸軍防邊勞苦無他生業惟事田作每歲自冬徂春迎送瓦剌使臣三月始得就田七月又復刈草八月以後脩治關塞計一歲中曾無休暇況邊地磽瘠霜早收薄若更徵稅則民不復耕必致竄逸計臣但務積粟不知人心不固雖有粟將誰與守帝納其言而止

十一年春正月庚辰太監王振姪林世襲錦衣衛指揮僉事錢僧保姪亮高讓姪玉曹吉祥弟整蔡忠姪革俱世襲副千戶二月辛酉異氣見華蓋殿金頂及奉天殿鴟吻之上遣官祭告天地癸亥詔卹刑獄安鄉伯張安與弟爭祿詔逮治法司與戶部相諉爲言官所劾三月戊辰戶部尙書王佐刑部尙書金濂右都御史陳鎰侍郎丁鉉馬昂副都御史丁璿程富等俱下獄數日釋之安興兄之孫也

福建銀場旣開盜礦者益衆葉宗留僭稱王遣戶部郎中楊謹往招撫浙江參議吳昇言福建礦盜出沒浙江江西廣東諸境東捕則西逃南搜則北竄若合而爲一其患不小宜特遣朝臣專董剿捕壬申命御史柳華督福建浙江江西兵討之華至福建遣兵分捕羣盜又令村聚皆置隘門望樓編民爲甲擇其豪爲長得自置兵仗督民巡徼盜稍戢而宗留劫掠如故癸酉帝如天壽山庚辰還宮夏六月丙辰京師地震初帝卽位詔凡課程門攤俱遵洪武舊額不得

藉口鈔法妄增尋以于謙奏革直省稅課司局領其稅於有司及是軍旅四出耗費動以鉅萬府庫空虛秋七月癸酉從王佐請增市廛稅鈔置彰義門官房收商稅課鈔復設直省稅課司官征權漸繁矣庚辰楊溥卒年七十五贈太師諡文定大理寺丞羅綺參贊寧

夏軍務嘗以事劾指揮任信陳斌二人皆王振黨轉訐綺不法事下總兵官黃真覆覈真謂綺常晉宦官爲老奴遂召綺還法司擬贖振改令馬順再鞫八月謫戍遼東戊戌免湖廣被災秋糧戶部侍

郎奈亨附王振嘗以事干請吏部不行恕郎中趙敏構之詞連王直及侍郎曹義趙新庚申下直等獄三法司廷鞫論亨斬直等贖徒帝宥直義奪亨新俸視職如故行人尙禰言古者刑不上大夫今文武大臣偶因微眚遽陷囹圄事或涉虛旋即復職是今日衣冠之大臣卽昨日受辱之囚繫面僚友而統屬官豈能無愧請自今有犯者召至午門大臣會問事實則疏其輕重請上裁決不實卽奏還其職

帝頗然之惑於王振不能改 九月辛巳廣西叛瑤執化州知州茅自得殺千戶汪義 沙州衛都督喃哥兄弟乖爭部衆攜貳任禮欲乘其饑窘遷之內地會喃哥亦請居肅州境內禮因遣都指揮毛哈喇往撫其衆而親帥兵繼其後比至喃哥復持兩端其部下欲奔瓦剌禮進兵逼之遂收其全部千二百餘人以還詔居之東昌平山二衛給田廬什器厚撫卹之而沙州爲罕東左衛酋班麻思結所有初成祖置哈密沙州赤斤罕東四衛於嘉峪關外屏蔽西陲至是沙州先廢諸衛亦漸不能自立肅州遂多事 冬十月甲寅遣給事中御史分賚諸邊軍士 十一月壬申減殊死以下罪 金濂薦李信圭擢處州知府其在清河已二十二年矣處州方苦旱信圭至卽雨未幾卒官清河民立祠祀之 也先攻兀良哈遣使抵大同乞糧并請見守備太監郭敬帝敕敬毋見毋予糧

十二年春三月癸亥帝如天壽山庚午還宮

丙子免杭嘉湖被災

秋糧 鳳陽知府楊瓚言民間子弟可造者多請增廣生員毋限額
禮部採瓚言考取附學天下學校之有附學生自此始 詔選侍講
江淵杜寧裴綸脩撰劉儼商輅編脩陳文楊鼎呂原劉俊王玉肄業
東閣曹鼎等爲之師 國子監祭酒李時勉連疏致仕朝臣及國子
生錢都門外者幾三千人或遠送至登舟候舟發乃去時勉爲祭酒
六年列格致誠正四號訓勵甚切崇廉恥抑奔競別賢否示勸懲諸
生貧不能婚葬者節省餐錢爲贍給督令讀書吟誦聲達旦不絕張
輔暨諸侯伯嘗奏願偕詣國子監聽講帝命以三月三日往時勉升
師席諸生以次立講五經各一章畢事設酒饌諸侯伯讓曰受教之
地當就諸生列坐惟輔與抗禮諸生歌鹿鳴之詩賓主雍雍盡暮散
去人稱爲太平盛事 夏四月丁巳免蘇松常鎮被災秋糧 五月
己亥大理少卿張驥巡視濟寧及淮揚饑民驥立法捕蝗停不急務
蠲逋發廩民賴以濟 有自瓦剌來歸者言也先謀入寇脫脫不花

止之也。先不聽尋約諸番共背中國。秋七月甲辰，飭各邊練軍備。瓦剌八月庚申朔日有食之。九月乙未，馬愉卒，贈禮部尚書兼學士，贈官兼職。自愉始，愉端重簡默，門無私謁，論事務寬厚，嘗言天下獄久者多瘕死，宜簡使者分道決遣，邊警方命將而別部使至，衆議執之，愉言賞善罰惡爲治之本，波及於善，非法乘人之來而執之，不武帝皆納焉。冬，命張鳳兼理南京糧儲。欽天監言北京北極出地度，太陽出入時刻與南京不同，冬夏晝夜長短亦異，今宮禁及官府漏箭皆南京舊式，不可用，有旨令內官監改造。初，方面大吏方正謝莊等由保舉擢用，已而得罪而不預保舉者在內，御史在外，知府往往九年不遷，給事中余忭論正莊等事敗，謂宜坐舉主，且言方面郡守有缺，吏部當奏請上裁。張輔、王直等言：「方面郡守保舉，升用稱職者多，未可更易。」帝從輔直議，而採忭疏，許言官指劾。楊洪充總兵官，鎮宣府。自宣德已來，迤北未嘗大舉入寇，惟朵顏三衛衆乘

間擾邊多不過百騎或數十騎他將率異懦洪獨以敢戰至大將諸部亦憚之稱爲楊王 安南遣將侵占城奪新州港虜其王摩訶賁該以歸其故王占巴的賴姪摩訶賁來遣使請命遣給事中陳誼行人薛幹往封爲占城國王 沐斌言臣遣使賁敕招諭思機發以其弟招賽未歸疑懼不敢出又掠緬甸牛馬金銀緬甸欲進兵攻取請遣人分諭木邦緬甸諸宣慰司令集蠻兵刻期過江分道進討臣等帥官軍萬人駐騰衝以助其勢從之斌等至騰衝機發終不出敕孟養頭目刀變蠻等伴送機發來朝復不至尋召招賽至京給冠帶隸錦衣衛其從人俱令於馴象所供役

十三年春斌以春瘴作江漲不可渡糧亦乏引兵還時中外咸願罷兵獨王振意未恆欲盡滅其種類三月戊子降敕切責刀變蠻等數其可伐之罪令執獻機發壬寅王驥仍總督軍務都督同知宮聚爲平蠻將軍充總兵官帥十五萬人討機發密諭驥曰萬一思機發遠

遁則先禽刀變蠻平其巢穴或遁入緬地緬人黨蔽亦相機禽之庶
蠻衆知懼大軍不爲徒出又敕木邦緬甸南甸干崖隴川各整兵備
船積糧以俟調度 柳華之編民爲甲也沙縣佃人鄧茂七得推擇
爲甲長茂七素無賴及是益以氣役屬鄉民沙縣俗佃人輸租外例
饋田主茂七倡其黨令毋饋而田主自往受粟田主訴於縣縣逮茂
七不赴下巡檢追攝茂七殺弓兵數人上官聞遣軍三百捕之被殺
傷幾盡巡檢及知縣並遇害茂七遂大剽掠僞稱劇平王設官屬黨
數萬人陷二十餘縣都指揮范真指揮彭璽等先後被殺處州賊葉
宗留陳鑑胡等並附茂七東南騷動初交趾人宋彰爲福建參政賄
王振得遷左布政使浸漁貪惡民不能堪益相率從亂福建巡按御
史汪澄牒江西浙江會兵討賊夏四月茂七圍延平刷卷御史張海
登城撫諭賊訴乞賞死免三年徭役卽解散爲良民海以聞澄尋以
賊降檄止鄰境兵江西巡按御史韓雍曰賊果降退未晚也遂趣兵